



Broj: SuPK-04-2075/24-I
Brčko, 29.10.2024. godine

SAOPŠTENJE ZA JAVNOST

UTVRĐENA NESTATUTARNOST ODLUKE O IMENOVANJU ŠEFA POLICIJE BRČKO DISTRIKTA BiH

Apelacioni sud Brčko distrikta BiH, na sjednici Vijeća održanoj dana 07.10.2024. godine, usvojio je inicijativu Z. K. za pokretanje postupka ocjene usklađenosti Odluke o imenovanju šefa Policije Brčko distrikta Bosne i Hercegovine broj 33-004427/20 od 09.11.2020. godine, te je utvrdio da ista nije u skladu sa odredbom člana 64. stav (2) Statuta Brčko distrikta Bosne i Hercegovine i da prestaje da važi danom objavljivanja ove presude u „Službenom glasniku Brčko distrikta Bosne i Hercegovine”.

Postupajući po predmetnoj inicijativi, Apelacioni sud Brčko distrikta BiH je utvrdio da je Odluka o imenovanju šefa Policije Brčko distrikta Bosne i Hercegovine od 9.11.2020. godine donesena na osnovu odredbe člana 79. Zakona o Policiji Brčko distrikta Bosne i Hercegovine, odnosno odredbe člana 10. Zakona o izmjenama i dopunama Zakona o Policiji Brčko distrikta Bosne i Hercegovine, koja je bila na snazi u vrijeme donošenja osporene Odluke, a shodno kojoj odredbi, za donošenje Odluke o imenovanju šefa Policije, nije bilo neophodno pribavljanje saglasnosti Skupštine.

Međutim, Gradonačelnik Brčko distrikta Bosne i Hercegovine, kao donosilac osporene Odluke, prilikom njenog donošenja je u potpunosti zanemario činjenicu da navedenim Zakonom o izmjenama i dopunama Zakona o Policiji Brčko distrikta Bosne i Hercegovine nisu mijenjane odredbe integralnog teksta Zakona o Policiji Brčko distrikta Bosne i Hercegovine, kojima se uređuje postupak izbora i imenovanja šefa Policije i njegovog zamjenika, a koje odredbe, između ostalog, propisuju obavezu davanja saglasnosti Skupštine Brčko distrikta Bosne i Hercegovine za njihovo imenovanje. Pored navedenog, donosilac Odluke je previdio i odredbu člana 64. stav (2) Statuta Brčko distrikta BiH koja takođe propisuje da šefa Policije imenuje Gradonačelnik uz saglasnost Skupštine na osnovu kriterija stručnosti i obavezujuće preporuke nezavisnog odbora za izbor kandidata osnovanog u skladu sa zakonom.

Imajući u vidu sve naprijed navedeno, Sud je našao neusklađenost Odluke o imenovanju šefa Policije Brčko distrikta Bosne i Hercegovine broj: 33-004427/20 od 09.11.2020. godine sa odredbom člana 64. stav (2) Statuta Brčko distrikta Bosne i Hercegovine, te je utvrdio da je Gradonačelnik donošenjem osporene Odluke povrijedio statutarnu obavezu pribavljanja saglasnosti Skupštine na izbor i imenovanje šefa Policije Brčko distrikta Bosne i Hercegovine.

O navedenoj presudi Apelacionog suda Brčko distrikta BiH detaljnije se možete informisati putem službenog web portala <https://apsud-brckodistriktbih.pravosudje.ba/> na kojem je ista dostupna za preuzimanje.

POMOĆNIK SEKRETARA/PORTPAROL
PRAVOSUDNE KOMISIJE

Dejan Nišić